


KrEUIZE



rondzendbraif

of

www.kreuzekeuze.nl



NUMMER 8

september
2007

verhoalen
gedichten
verskes
nijs

Vrij rond te sturen noar elkenain dij t lezen wil.

KREUZE nummer 8

2^o joargang – september 2007

redaksie: Jan Blaauw (tekst);
Henk de Weerd (opmaak)

redaksie-adres: Verl.Oosterweg 33
9804 RD Noordhorn
0594-503095

JanBlaauw@kreuzekeuze.nl
henkdeweerd@kreuzekeuze.nl


Vrij rond te sturen; nait zo mor wat overnemen zunder toestemmen van schrieffster/schriever!



Op de webstee www.kreuzekeuze.nl binnen ook de veurege òfleverns te vinden.
Krieg je hom mor nait te pakken?
Kin wezen dat **flash player** nait installeerd is.
Goa noar: http://www.adobe.com/shockwave/download/triggerpages_mmcom/flash.html
en de computer regelt t veur joe.

Kreuze 9 komt oet begun november
Biedroagen kin j'opsturen tot 24 oktober

INHOLD:



BLADZIEDE:

| | |
|---|--------|
| Veurblad | 1 |
| Inhold | 2 |
| Hakkemak en Nikkenak | 3 |
| Widde wieven van Hoezen– Anna de Vries– Maarhuis | 4 |
| Moi köster– Alice van der Meer | 5 |
| Spelbedaarf– Jan Blaauw | 5 |
| Fietsen – George Petzinger | 6 |
| n Mobieltje– Gerrie Schaank | 7 |
| Galgenhumor– George Petzinger | 7 |
| Wotteroverlast - Bé | 8 |
| As doe der nait bist– Ronald Ohlsen | 9 |
| Verlaifd– Roel Sanders | 9 |
| Van oost noar west- Jan Blaauw | 10, 11 |
| Gedichten– Tiny Veldhuis | 11 |
| Dikkedakken– George Petzinger | 12 |
| Optaikens e.d.– Giny Vonk | 13 |
| Limericks– Jan van Dord, Roel Sanders | 13 |
| Gedichten– Hanne Wilzing | 14 |
| Voele Stevels– Fré Zandinga | 15 |
| Zol t ?–Roel Sanders | 15 |
| Loop mor deur– Geert Zijlstra | 16 |
| Cyclus– Siet Bootsman | 17 |
| Cryptofilippine– Henk de Weerd | 18 |
| Poaskevlinder– Henk de Weerd | 19 |

HAKKEMAK EN NIKKENAK

Augustus 2007

Kunstgaang Kaampke

Wel Steem zegt, zegt `Kunstgaang Kaampke`, zegt 25 `Kopmeskes`, zegt `Dou mor gewoon, din dou j'aal gek genoeg, mor as je gewoon doun, dou t din mor op zien Grunnegers`, zegt `Tiny Veldhuis`, `Anna de Vries`, `Aukje Tillema`....

Baarg te doun in Steem en wiede omgeven, zo as eterij en veurleesderij op 1 september in Oskert. Wil je VRUND worden van Kaampke? Stuur mor even n braifke noar info@kunstgaangkaampke.nl of kiek op webstee: www.kunstgaangkaampke.nl. Veur n poar euro's in t joar heur je der ook bie, wait je votdoadelk as der wat te doun is, wát der te doun is!

Nog even wat:

“Kunstgaang Kaampke bestaait nou goud aacht joar en zel, wat bestuur aangaait, nog n mooi zetje deurgoan mit aal doar zai mit aan loop is. Doch zel der wat veranern. Kaampke konnen ie aaltied vienen op **Kampweg 7** ien Steem. Doar hillen wie tentoonstellens, schillerwedstrieden, Grunneger Oavens, en goa mor wieder. Dat gaat veranern.

t Onnerkommen van Kaampke zel verkocht worren en aigeners goan vervoaren. Nait omreden zai zat van Steem en Kaampke binnen, mor om persoonleke redens. Wie zellen op zuik goan noar n aner lokoatsie, laist ien Steem. Wie hopen dat ie Kaampke steunen blieven en dat wie mitnkanner nog schiere tieden hemmen zellen.” (*Braifke van Tiny Veldhuis noamens bestuur van Kaampke*)

Ede Staal

Berichtje kregen van Fré Westerhoff. Hai is nait allenneg n filmamateur, zo as e zulf zegt, mor ook n groot laifhebber van Ede Staal. Fré het twij films moakt, waarvan e denkt dat anere laifhebbbers van Ede Staal dij geern zain willen. Din mouten ze even noar:

www.freewesterhoff.nl

Grunneger Dainst

In d'Olle Lutherse Kerke op t Spui in Amsterdam wordt op **zundag 28 oktober n Grunneger Dainst** holden. Wil je doar meer van waiten? Kiek mor even op webstee: www.elgadam.nl. Of stuur n braifke noar h.wilzing@diaconie.com. Riemke Bakker van Stichten Grunneger Toal nuimt t “n logisch vervolg op cursus Grunneger Toal ien Amsterdam, zo liekt t heur tou. Wel wait wat der nog meer komt: WAARK in de Stadsschouwburg, Törf in t Concertgebouw.....

Kiek ook op:

www.oostfreeske-taal.de

www.diesel-online.de

www.hetverhaalvan groningen.nl

NIJE RUBRIEK: ANNEKEDOTES

In t Grunnegers leven der van dij körde grappege verhoaltjes, waarvan het voak nait meer dudelk is wel ze moakt het of waar ze vandoan kommen.

As je zo wat waiten of tegenkommen en je vinnen ze muite weerd, stuur ze mor, zetten wie ze in K@euzel! (*Idee van Siet Bootsman, (ik zel nait pronken mit anermans veren...)*)



1. “Boer gaat lopens mit kou noar bol. Ien Ebbenstroat zigt hai n bord mit BOLDOOT 4711. Sneu bestek. Registroatsienummer der nog wel bie. Mismoudeg lopt t spul weer noar hoes tou.” (*Instuurd deur Siet Bootsman*)

2. “Veur daarde keer kuiert notaereszeun mit t wichtje deur t laand. “Zullen wij elkaar tutoyeren?” vragt hai. “Wadde?” zegt t wicht. “Hier? Ien t nadde gras?” (*Instuurd deur Siet Bootsman*)



3. Roadsetlje: “Kwam op n diekje, kwam op n damke, kwam ik n roodbont ondje tegen. k Heb zien noam al drijmoal zegd. Hou hait dat ondje?” (*Kregen van Jan Eedoes (Heethuis) Groeten van Texel!*)



Widde wieven van Hoezen

[n verhaal van mien schoonpa]

In achterhoes van stoatege ploats Framahoord zitten Minoa en Teun.

Baaident waarken zai doar, ain as maaid en aander as middelvent. Aaid drok .

Rondom ploats lopt n braide graacht mit n schiere looploan der noast.

Minoa en Teun binnen doar wiswoar nog noeit west. Zai lopen nait over van driesteghaid, t is der spoukeg.

Op dij looploan haar zai ze zain, twij widde wieven, bie naacht en ontied luipen zai doar. Aldernoast kèl was Minoa der van. Teun trok wat mit zien scholders dou maaid hom dat vertellen dee.

Boerin was wel aais wat zunderling, dat wel.....moar ,och t zol wat, hai hoalde zok nou dingen in kop dij messchains ainmoal gain woarhaaid wazzen, wat nait kon. Moar nou zaten zai soam in achterhoes om bie te kommen van grode schrik, om wat ter vannaacht loos west het.

Boer was gusteroavend eefkes west. Of Teun aalgedureg wel bie Grait drij kieken wol, t was sikkoms zo wied dat kaalf der oet kommen zol. Boer haar der bie zegen doan, om störlanteern nait oet te doun, din haar hai ja gliiek licht op aachterdeel.

Noa zoon anderhaalf uur ging Teun ais kieken bie Grait drij, wat hai dou zaag.....nait te begriepen.

Stoef bie kou zat n widde gedoante, aandoekte zaacht kouekop. Flusterde laive woorden tegen kou.

Teun ston stokstief, störlanteern ston noast heur, in stro. Mien laive tiedpot, laamp vil ook nog aalaan om, moar gain braand. Widde gedoante dee heur haand eefkes op lanteern, en vlamke dee t weer. Oaflopen naacht was e haildaal verhilderd west, dou hai t vertelde aan Minoa. Vertellen?.....hai kon ja gain woord oetbringen. Aal moar wizen noar achterdeel, doar was t te doun. Minoa was nijsgierig en baang. Dou baai-

dent op achterdeel kwamen, ston haart sikkoms stil, nait ain moar twij widde wieven zaten bie kou.

Teun en Minoa haren nkander stief vaast. Kiek nou toch ais, doar lag kaalf, kletsnat, widde wief was daaier drög aan t moaken mit n boske stro. Stoan blieven, gain stap konden zai doun. Aander widde wief bleef bie kou stoan.

Noa n haalf uur was aal kloar. Widde wieven gingen vot, moar störlanteern wer mitnomen. Hail veurzichtig wer boetendeur open doan en vot wazzen baaide wieven, duusternis haar heur insloten.

n Klaain lichtje haren zai nog schienen zain deur roamke van achterdeel.

Teun en Minoa leuven in spouken, want voak zain zai n lichtje op looploan rond Framma. Veur gain gold goan zai noar boeten tou, om ais kieken te goan.

Proat is der nog nait overoet. Ook boer en boerin wollen t nait leuven, zokse roare dingen kinnen nait op Framahoord heergoan. Moar wat boer wel hail vrumd von? Aan spieker op achterdeel haangt störlanteern nait. Teun wait der niks van oaf. Wie goan moar aan zuik, zegt

boer. Op looploan ?....wiswoar nait. Overdag nait, en nait bie duustern.

As blinden op gloep stoan, wil Minoa nog wel ais eefkes noar boeten kieken.

Joa e, widde wieven mit heur lichtje. Baaident dwoalen din rond Framahoord.

Moar bie oavend noar boeten goan , doar mout ie bie Teun en Minoa nait mit aan kommen.

Want widde wieven op n looploan, mit n störlanteern bestoan eerlieks.....hail eerlieks.

Anna de Vries-Maarhuis



Cursus Grunnings ien Amsterdam het n haile schiere reactie opleverd :



Moi Köster!

Hest mie toal weerom geven,
toal van vrouger.
k Zai mien oma ien Ten Post
bie heur bonen en baiten in toen,
doeven op deel,
wentelteefkes in kebof.
Roamen besloagen, nait veul frizze lucht.
Deerde mie nait, k was tien joar.
Zo veul schiere woorden:
diezeg, dokeg, doeknekt, doamel en
n glinne gloud.
k Daank die köster,
t was een waarm nust.

Alice van der Meer.

*(Deurgeven deur Jan Sleumer,
kurzesköster)*

.....

SPELBEDAARF

Mit kappe stoet schaif ofsmeden,
dik botter derop (blaauwe baand),
runt e noar t sportveld. Bale onder
aner aarm, kaauwen gait lopiesweg.

Zien jopper is binnen körtste keren
doelpoale, net as jaze van buurjong
dij vannijs persies ofstand oftredt,
zok oetrekt, doarboven is over.

Drij korners penaltie, boetenspel
doun ze nait aan, tekkeln verboden.
“Aanschoten hands, aanschoten!”
“Speulst gemain, dust nait meer mit!”

Slörm van vieftien komt dichterbie,
smit peukje vot, pakt bale in hannen,
blift kniezend stoan. Dìn n wilde trap
over t goas in toene bie Strieker...

Even is e riddersloagen, gait mit
n boge om grode jong tou noar
d’oetgang, steert tussen bainen,
op zuik noar bale maank mous

Jan Blaauw



Fietsen

Hou voaker of k t heur, hou vergrelder ik wor. Fietsen, dat is veur mie waarken zunder hunneg. Mien ol heer zee t vrouger voak. "Waarken, der is gain mooier ding as waarken. Kin der wel uren noar kieken" Zo kiek ik nou noar fietsen. t Is niks as trap-pen woaraargens hin, mor je mouten ook nog weerom. En wat heb je der aan ? Niks. Soms din binnen de omstandigheden zo, dat je joe der nait veur wegdraaien kinnen. Zo was t ook dizze keer.

Wie waren mit caravan noar d'Achterhouk reden. Goie vrunden van ons hebben ook n caravan en dij hadden vraauw kop gek moakt. "Fietsen mitnemen hè!" Nou kinnen wie reusachteg mit dizze luu overweg, moar of dat ook zo wezen zol as we mit heur op vekaansie gingen.... Wie besloten t er op te woagen. Wie kwamen terecht op n camping in Vorden. t Ston ons direkt al aan. Baaide caravans hebben we zo hinzet dat toaveltjes en stoultjes der tus-senin stoon konden "veur de gezelleghaid". Vraauwlu muiken kovvie, kameroad en ik konden uutbloazen van t waark. Fietsen ha-ren wie tegen n boom zet achter de cara-vans. t Weer luit zok van de beste kaante zain, soavends konden wie boeten eten. Wie besloten dag mit n potje rummiekup en n ditje en n datje. Òfsproken wör dat we vol-gende dag op fietse d'omgeven verkennen zollen.

Anerdoags waren wie al op tied wakker en noa t broodeten gingen wie op pad. Mien kameroad har al n route uutstippeld, wie be-gonnen vol goie moud mit onze verkennen. As je wel ais in de Achterhouk west binnen, zel je tougeven, dat het doar meroakels mooi is. "Een Eldorado voor wielrijders" staat in de VVV-folders.

Allain....ik bin nait zo n fietser. t Zakt mie hail gaauw in de bainen en ik mout aalgedu-reg van t zoadel of, om reden dat ik soms nait meer wait of ik n hai of n zai bin.... Ik loat mie hou din ook nait kennen en kin van zo n tochtje, as t nait te ver is, toch wel genieten. Dou wie op weeromweg waren noar camping, zee ain van doames, dat we nog even wat boodschappen doun mozzen. Bepakt en bezakt kwammen wie bie cara-vans aan. Boodschappen wörren utpakt,

d'oavend verluip zoas wie geern hadden. Volgende mörn bie t ontbijt vruig mien vraauw, woar k krintebollen loaten haar. Nou haar ik gain boodschappen opborgen, dus vruig ik of ze wel alles oet fietstazze hoald haar. Veur zekerhaid ging ik zulf mor even kieken. Ik zag votdoadelk dat er wat nait in orde was. In fietstazze was n groot gat kaauwd. Dou ik kleppe optilde, zag ik een aanvreten plastic puut mit nog wat res-tanten van krintebollen. Bie zowat ston je wel even mit d' ogen te knippenn. Wel was der mit onze krintebollen vandeur? Wie wozzen het nait.

Wie aten brood zunder krintebollen en om-dat het schier weer was besloten wie n wan-deling te moaken.

Tegen middag waren we trogge en zag ik bie mien fietse wat bewegen. "Stop", zee ik, "blief stoan, der zit aine bie mien fietstazze." Verboasd zaggen wie n eekhoorn t gat in tazze nog wat groter moaken, kon e restan-ten van de bollen ook nog even mitnemen. Dou hai ons in de goaten kreeg, zag ik hom twieveln of e wegrunnen zól. Dou wie ons bewogen, muik e toch mor dat e wegkwam.

Wie hadden doader op haiterdoad be-trapt.

Wie hebben dij weke nog hail wat òftrapt en ik mout zeggen: "t Is mie nait tegenvalen". Op t end waren wie t hartgrondeg ains: "t Is veur herhoalen vatboar !"

George Petzinger



n Mobieltje



Gerrie Schaank

k Wol nooit zo'n ding hebben.
 Mor ast mit dien auto aan Duitse autoboan,
 op weg noar wintersport, stilstoan blifst en
 din uren aan de wandel bist om van de boan
 oaf n telefoon te vinden..... Din ook nog
 ains over verkeerde autoboan nog n poar
 uur de verkeerde kaant olopst.....
 Din dien auto mit vraauw drin nait terugges-
 vinden kinst..... Din dinkst toch wel:
 "Haar k nou mor zo'n ding had!"
 En din wil k joe d'ellinde bespoaren van dat
 Duitse plietsie mie van boan oafplokt het en
 noar mien auto brocht het..... De ADAC-
 man de auto nait reparaaiern kon en ons
 noar n hotel sleepte dij vol zat..... Wie mit
 tien groaden onder nul ien auto sloopen
 hebben op t terraain van n geroazie, dij de
 volgende dag de auto nait moaken kon of
 wol, omreden dat t zoaterdag was..... Wie
 mit n huurauto wieder mozzen, dij wie ook
 nog ien de prak reden hebben, zodat der
 weer n nije huurauto kommen mos.....
 As wie mor zo'n mobieltje had haarn, din
 was t apmoal veul vlotter goan.
 Wie hebben ons din ook votdoadelk noa va-
 kaanzie zo'n ding aanschaft.
 Veur noodgevallen vanzulfs en nait veur aal
 dat geplaas woar maiste lu hom veur bru-
 ken.
 Mor begunst toch aal meer aan zo'n ding te
 ontdekken. Der zit ook SMS op, veur
 korte braifkes schrieven. En dat mag k nog
 wel ains geern doun mit buurjong.
 n Beetje maaljoagen zeg mor.

En zo kreeg ik n moal n wonderliek SMS-
 braifke dou wie op vakaanzie ien Venetie
 wazzen. (Vraauw zeurde aal datteg joar dat
 zai n moal noar dat romantieze Venetie wol
 en ik heb t datteg joar tegenhouden kind,
 mor mit Pinkstern mos t der din indelk van
 kommen. t Vuil nait tegen mout k eerlieks
 zegen. t Het de reloatsie oardeg opfrist).
 Mor goud, doar ien t ltoalioanse Giethoorn

kreeg ik t volgende SMS-berichie: "Ma, hier
 Cora. De kinderen zijn dinsdag onverwachts
 vrij van school. Hoe zit dat met oppassen?
 Bericht even terug."

Nou, dat braifke was duudlek nait veur mie
 bestimd. Cora was n beetje mit de nummers
 aan t knooien west, ducht mie.
 En toun kon ik t nait loaten en braifde terug-
 ges:

"Cora, ik wil niet langer op die rotkinderen
 van jou passen. Punt uit! Ma."

Of 't weer goudkommen is tussen Cora en
 heur moeke wait ik nait.

Ik heb nooit meer wat van Cora heard.

.....

GALGENHUMOR

George Petzinger

Ruip n koopman noar t volk op Adrillen:
 "Koop hier joen vermoageringspillen!
 De vraauw super-slaank!
 Wat minder geld op de baank,
 mor ie kinnen joe der nait aan vertillen!"

n Schatrieke boer oet Boertange
 haar niks meer van t leven te verlangen.
 Hai knupte zok op,
 mor dou brak hom de strop...
 Alzo bleef hai nait laank genog hangen.



n Dokter oet t Oost-Vraize Broase
 kocht veur vraauw n boeket in de voaze.
 Zai zee: "Hest wat te verbaargen?"
 Doar kon man nait om lagen
 en hai sluig heur mit bloumen op de moaze.

Wotteroverlast



“Ich hab’ noch einen Koffer in Berlin...”

Geert het radio derbij aan, ien e keuken, bij de grode toavel. Hij zit met e voeten ien t wotter, waarm wotter, omreden zien noagels sikkom niet meer te knippen bennen. Verkalkt. As dat mor niet op zien oaders slag... Eerst mor even wat veurweken en dan met dij nije tang aan t waark.

“Is dat nou Marleentje Dietrich, die doar zo swoel heur vergeetachtigheid onner woorden brengt? Of is t Hilde Knief? Die liet ok aalgedureg heur pakkeloazie in de Duutse hoofdstad stoan. En mor janken en jeuzeln veur de mikrofoon...”

Geert veraltereert as der n stem meziek ofkapt: “Hier volgt een politiebericht!” Op t zulfde moment gobbelt t wotter ien t blikje over de raand en lopt radjes over t zeil, ale kaanten op. Geert perbeert de ramp ien te dammen, hij wil stoan goan, mor dan moakt t blikje vannijs n schuver. Hup, tweede golf over de raand, groder nog as eerste. Krekt of e op t strand stijjt bij De Koog, de Noordzeebranding noaspeult.

“Einde politiebericht!” heurt e nog net. t Wotter op e keukenvloer het ien tied iemeg t natte oppervlak vergroot, soort mini Blauwe Stad met de linker pantovvel van zien vrouw as rondvaartboot en de deurweekte pepieren zak met harde bolletjes as toeristische trekpleister. Ok dat nog.... Veurzichteg komt Geert ien t enne, hij holdt zuk eerst even aan e keukentoavel vast, met d’aandre haand wil e zien handdoek pakken, die ligt op e schuddelbaank. Op dat ogenblik komt zien vrouw de keuken binnendendern:

“Geert, het jim net dat bericht heurd veur de radio?”

Geert roakt pront zien wankel evenwicht kwiet, zien iene voet glibbert ien e richten

van e puut met bolletjes, t blikje met de aandere schuufft juist aner kaant op, net genoeg om Geert kapseizen te loaten. Doar ligt e, ien t wotter, blikje is deur aal dat gedoe omkieperd, aan e voeten van zien vrouw die riddersloagen met grode ogen noar heur kerel kikt.

“Wat krieggen we nou dan??? Is jim onverwachts met swem- of met zeillezzen begund? k Zol dan mor n aandre boksem om e kont doen, nou is dien stuutsiekoren Wehkamper glad bedörven, t mooie is der vot doadelk of.”

En dan begunt ze te laggen, te laggen, ze wiet van gien opholden. Noaberske van twij hoog doarachter, Riekje Revel, trekt achterdeur open, wil de keuken ienstappen, mor Geert zien vrouw blokkeert de toegang. Riekje zigt allent wotter op de vloer, n stuk van n stuutsiekoren boksem en n omvalen blikje.

“Wel allemachteg, wat het Geert nou weer ommans?”

“Riekje, even wachten, Geert het n noodlanden moakt, Poort komt zo veur de wegsleperij...” En weer klinkt heur vèdroagende lag, nog wieder vot, achterdeur stijjt ja open. Ien tied lukt t Geert endelk ien e benen te kommen. Hij wil op e keukenstoel deel valen, mor dat wiet zien vrouw nog net veur te wezen.

“Is jim nou hielendal van de pot rukt? Ok nog mien mooie stoel kleddernat moaken? Niks dervan! Noar boven, verschoon dij mor! Kiek onze Olumpische zwemkampioen doar nou ies stoan....” En vannijs rollen de lagsalvo’s deur t huus en zien omgeven.

“Riekje, kan jim mij de vaal even aanlangen? Joa, met dij gele emmer, bedankt.”

Geert is ondertied ofdropen richting trappen. Hij heurt Riekje nog krekt vroagen noar dat plietsiebericht veur de radio.

“Och”, zegt Geert zien vrouw, “dat ging om n kovver, n verdachte kovver op t stoatsion, joa, woar was t ok al weer....”

“Berlien”, fluustert Geert ien zukzulf,

“Dietrich of Knief, wel wast ok al weer....”

En hij moakt dat e noar boven komt.

Bé



AS DOE DER NAIT BIST *

As doe der nait bist
is der veur mie nait veul aan
Ik zit wat te wachten naargens op
Ik wait waar doe bist
En ook waarom doe doar most goan
moar doch denk ik dat t aiglieks aans is.

As doe der nait bist
wait ik nait wat k aanmot mit dag
grote lege stroaten van stad
Ik heur miezulf proaten
en als ik luuster is t dien noam
dij deurklinkt ien elke zin dij ik zeg.

As doe der nait bist
verdwiint oam oet dingen
en muziek van laidjes dij ik zing
Ik heur miezulf roazen
ien lijte van stilleghaid
is t zo kòld da'k der aal nait wezen kin.

As doe der nait bist
kiek ik mit lege vrumde ogen
ien spaigel noar n kop dij k nait kin
Ik zai miezulf goan
van aine kaant noar aander
en din terug, aals moar deur, woar ik ook bin.

© Ronald Ohlsen

* *Laidtekst, schreven deur Ronald Ohlsen, op meziek zet deur Eddie Loonstra. Verske is opnommen deur Roel van der Zee en heb j'al heuren kind veur Radio Noord. Meer waiten? Kiek mor op webstee www.roelvanderzee.nl. (Twijtoaleg!) Meziek kin vergees hoald worden vanof www.muziekvanloonstra.nl. Din, zo as Roel schrift: "Wie huvven en willen der nait aan verdainen."*

Verlaifd

k Zag heur stoan doar op de maart,
tezoam mit n poar aandre wichter.
k Vond heur dou al hail apaart,
allent leek mie heur hoar wat lichter.

k Wis nait goud, woaraan dat lag,
mor t ston heur aldernuverst.
Mien haart was krek totoal van slag,
heur ogen stroalden t zuverst.

Wat zel k doun, duur k t te woagen?
d'Haanden trillen mie zenewachteg.
Zel k dit wichtje mor ais vroagen,
As k mit mog lopen, was t ja prachteg.

Tou jong blief nou nait zo dreudeln,
temet is n aander die nog veur.
Scholders recht, even strikje frozzeln
en beken t wicht mor kleur.

k Wol zo groag even mit die proaten,
of bin k die veuralsnog te min.
As t kin heur k dat t laifst vanoavend,
geef mie nou mor gaauw mien zin.

Eerst luipen wie verlegen te krukken,
hail veul proatjes haren wie nait.
Goandewegs wol t beder lukken,
Joe waiten zulfz wel hou dat gait.

Bie heur huus gaf k heur n smokje,
k Mos ja ok nog zoveul leren.
Zie vuil biekaans van heur stokje.
Mor vanof dij tied haar k ..verkeren.

Haandjeknovvelnd luipen wie under moan,
t Mog van mie vanzulfz wel aiweg duren.
Kilometers mit plezaaier noast heur goan,
Gain mensk huifde mie hierin te sturen.

Joaren binnen meroakels rad veurbie vlogen,
k Zol t mit laifde zo weer overdoun.
Kinnen op veul gelok en zegen bogen,
al lopen wie strammer nou as dou.

Roel Sanders



VAN OOST NOAR WEST



en sums weerom (7)

Voetballen.... Van huus noar school: lutje bal aan e voet. Uut school: aaltied n balletje trappen, achter t huus, op e weg of op t veld aan de Mennistenloan ien Midwol. Der was niet zoveul aans op t dörp en gimmestiek, nee, doar mos k niks van hebben. (En ik kon der ok ja niks van...) Lid van n voetbalklup? Nee, dat zat der doe niet ien. Mien pa was n voetballiefhebber, mor as ik ies n moal zei dat ik bij MOVV voetballen wol, dan was zien kommentaar: "Komt niks van in, ze schuppen die de bainen kepot..." Hij ging ok elke twijweek kieken hoe dat kepot schuppen ofliep, bij t eerste van de roodzwarten op t laand van boer S.P.Meijer, tussen Midwol en Oostwold ien. Doar kon je allent mor kommen langs n laange ree, oprit bij Oadam Timmer zien fietswinkel. Wied vot van de bebouwde kom, haren kerkgangers gien hinder van t gereer op en rond t veld. (Niks meer van over, verzopen. Wotter van t Oldambtmeer waggelt doar). Op t gemientelk sportpark ien t dörp mog zundags niet voetbald worden, steurend veur de kerkgang.. As kiend ben k voak noar MOVV toe west, op zundagmiddag. Op tied, dan was de koartjesverkoper der nog niet. Wij wizzen sekuur wie dat was, miest kantineboas Strootman. As hij met de rol koartjes aan zien ronden om t veld hèn begon, stonnen wij al aan d'overkaant. Gewoon zörge dat der n half veld tussen bleef, geld haren we ja niet. (Woarschienlek waren ze ok niet op jacht noar kiender, mor dat vulen wij toen doch aans...)

Bekende noamen op t beruchte knollenveld schieten mij zo deur de kop: Ellos, t waarkpeerd op t middenveld, Geert Bouldag op linksveur, Haarm van der Loan ien doel. Jan Farries, Ole Sporrel, Piet "t kenon" Loer.... Der was aaltied wel wat te beleven. Balen vlogen asmits wied vot, ok op t laand van melkboer Schaub die de pest haar aan voetballen op zundag. Ienmoal het e de bal

"ien beslag" nomen, ging e op zien fiets, bal onder d'aarm, noar huus toe. Mien pa duvels, wij kregen votdoadelk n'aandre melkboer aan deur. Loater kreeg MOVV n nij veld op Nijssiesoord, honder meter veurbij ons huus. Mor toen waren mien broer en ik al op Scheemde richt, deur d'ULO (en deur wichter). Scheemde speulde ien die joaren n klas hoger, kreeg meer volk op t sportpark aan de Plantsoenloan (mèt tribune!). Nije helden zo as Bonzo Hoogstroaten, Jan Pruisman, voetbalfamilie De Wal.... En onder tribune kon je slik kopen bij Brandsma, of n puut doppinda's, "souskes" zeiden we ien Oost-Grunnen. Ien Winschoot kwam n nije ster ien belangstellen, n jong van zeuventien: Klaas Nuninga ("Nuuntje"), bij WVV, ien e bomenbuurt. Genot om noar te kieken, mor ja, hij was gauw vot, eerst noar de Stad, loater noar Ajax ien Amsterdam, veur ons t hoogste van t hoogste.

Van Oost- noar West-Grunnen ging ik ien november 1967. Eerst allent deurdeweeks, gien gelegenheid om ien t weekenne bij Zuudhörn aan het Van Starckenborghkenoal te kieken. Dat wer makkelker noa ons trouwen ien desember 1969, toen kregen we n wonen aan de Kleveringaloan, mooie tied. Bij d'eerste elftallen op zoaterdag- en zundagmiddag was t even wennen. Veur mij was t nij, twee ofdelens ien ién vereniging. (En doar ston toen nog wel ies wat spanning op....) Bij de zundag ston Gerrit Diekstroa ien t doel, hij haar van die grode hannen.... En Anne Tillemoa liep elkenien deruut, links veur. Asmits liep e zulkzulf deruut of uut t veld... (Hij wer nog wel ies schopt, ienmoal gaf e n schop weerom en liep toen mor votdoadelk noar de kleedkoamer....)

Televizie was der toen al bijkommen met aal die glorie van Ajax en Feyenoord. Kiender op school vonden dat ok ja prachteg! Veur mij was dat voetballen op TV begund met n wedstried van Nederland tegen Oostenriek ien e viefteger joaren (Abe miste n geweldige kans). Ien die tied haar nog mor n enkeling zo'n apperoat. Wij keken ien n volle komamer bij de familie Pijning aan d'Oosterd ien Scheemde.

t Vrumde is dat tegenswoordeg die TV-voetballerij mij al gauw op e zenen waarkt. Of ik wor der lanterg van. Komt messchien ok deur alle poeha en rekloame en d'idiote bedroagen die der ien omgoan. Al blift de

FC vanzulfs nog aaltied favoriet, uutzun-
derns blieden der ja. Kieken ien t stadion?
Nee, doar kan k niet best tegen. Joaren le-
den haar k nog wel ies n joarkoart, mor k zat
voak te bibbern op mien stee, van de kol en
van de zenen. Toen Grunnen n moal van
NAC (toen nog met n jonge Van Hooydonk)
verloor met 3-4, noa n veursprong van 3-0,
ging k doodziek noar huus en dat wol
d'eerste doagen mor niet betern. Staarvens-
woar!
Voetballen kieken, schienboarliek heb ik
mien porzie wel had....

Jan Blaauw



LEEG

n Lege traain gaat mit hom vot
op n leeg perron zigt zai
mit lege ogen
lege roamen
bie heur leeg liggoam laans goan

ze stekt heur lege hand omhoog
n leste groet aan dij leegte
veur Stadse Iedeghaid
heur leegte
nog leger maakt.

Tiny Veldhuis

Dit gedicht staat ien:
"Hou wil t kinnen" gedachten ien n
deuske



DREUM

Gain schiller kin mien dreum ien kleuren
vangen
omreden hai ien t swaarde gat
verswient
van haitied weer bewusteloos
verlangen
noar t kleurenpad doar k sumtieds laip as
kiend.



ZUN EN REGEN

Sumtieds brekt zun deur wolkenbrij
zai wil mien liggoam geern strelen
n regenvloag kin zuks nait velen
let mie heur nattens kold en rij.

Tiny Veldhuis
Steem



Der binnen van dij doagen, dat je echt zin hebben om es flink wat aan te pakken. Dit was zo'n dag. Wat nait zo voak veurkomt, was gebeurd. Wie hadden meroakel goud sloapen. As je jong binnen stoa je doar nait rëcht bie stil, mor op onze leeftied het dat n zekere loaden. Goud sloapen kerel, wat n luxe! Hou den ook, ik vuilde mie as n jonge bok in n hok vol geiten, zogezègd. Noa t broodeten zee ik den ook: "Mie dunkt, dat ik mie mor es even goa vertreden." Het weer zugt der goud uut en ik mout toch ook n beetje bewegen hebben veur mien olle stramme botten. "Gaist mit ?", zee ik tegen vraauw, moar dij begon geliek zo veel waark op te nuimen, dat nog aalmoal gebeuren mos, dat ik hoop op gezelschap al gaauw opgaf. "Ast toch lopen gaist, loop den even bie bakker Griepstroa langs", zee vraauw. Bakker Griepstroa...? Ik haar der wel es van heurd. "Wat is der den ?", Vruig ik. Dou kwam der op de vrouge mörge n hail verhoal lös, woar ik nait op zat te wachten.... Wat was t geval:

In t moandelkse proatje haren de buurvraauwlu t had over eten en drinken, vanzulf veuraal over lekkere dingen en woar je dij t beste aanschaffen kinnen. Lekkere dingen binnen veur vraauwlu van n zekere leeftied n gewild onderwaarp, om reden, dat ze aalmoal op zien tied op dieet binnen om de vetkwaben n beetje weg te waarken. Mor as ze de teugels weer n beetje vieren loaten kinnen, den willen ze ook t lekkerste van t lekkerste hebben. En bie bakker Griepstroa kin je van dij aibels lekkere amandelringen kriegen "Ast der toch langs komst, kinst wel even n stuk of wat mitnemen. Hest ja wel gèld in de buutse, ik betoal die loater wel even trogge." Nou was bakker Griepstroa veur mien plannen n nuver ènde oet de richen, mor...je mouten per slot van reken wat doun veur de onderlinge vrede. Dus zee ik, achterbakse kerel: "Oh das goud, k was toch van plan doar langs te goan."

Wat was ik bliede dou ik n goud uur loater de winkel van Griepstroa zag. Doar hebben ze noamelk n "zitje". Dat betaikent, dat je even zitten kinnen mit n vergees kopke kovvie uut d'automat. Ik zee tegen juffrauw achter teunbaanke: "Vraauw het mie stuurd, omdat ie van dij lekkere amandel-

ringen hebben. Ik wol doar wel even n pakje van mitnemen." "Houveul mouten der in zitten?", vruig de juffrauw. "Eh"..., twievelde ik, "genog veur ons baaiden, ik main mien vraauw en ik."

"Wie hebben pakjes van vaar en van zes ringen", zee ze

"Wat mout dat kosten?", vruig ik.

"Pakjes van vare kosten vaar euro en pakjes van zèzze kosten vief euro vatteg."

Nou stoa ik overal bekind as vrij zuneg. Dat is nait zo, mor as je ainmoal de noam hebben wor je hom joen haile leven nait weer kwiet.

Ik docht: "Dij van zes ringen is net even veurdaileger, doar hebben wie drij aovends wat aan..." Dus ik zee: "Dou mie mor aine mit zes ringen".

Zie dee mie ze hail netjes in n plestieken puut. Ik betuil en ging nog even op stoule zitten om mien kovvie op te drinken.

Dou ik aanstalten muik om weg te goan, zee ze: "Nog n prettege dag wins ik joe tou en verlais ze nait onderwegens, aans krieg je roezie mit de vraauw."

Kerel man, dat mins har gevuil veur humor. Dat riemde ja...!! Kin wezen dat ze t zulf nait ains in de goaten haar....!

Onderwegens noar hoes docht ik bie miezulf:... "Wat kin n beetje vrundelkhaid toch n bult uitmoaken. Wedden dat ze bie Griepstroa veel verkopen en nait allaint omdat t zo lekker is.??!!"

Dou ik tegen de middag weer in hoes kwam, zat vraauw al op mie te wachten. "Nou,.. hest amandelringen kregen?", vruig ze.

"Zeker wel," zee ik, "Kregen is nait t juuste woord, ik krieg vief euro vatteg van die".

"Nou, den schenk ik kovvie in, kinnen we votdoadelk n ringe pebaaiern."

Dou we gezellig bie mekoar zaten, luit ik veur miezulf alles nog even de revue passer: vief euro vatteg veur zes ringen ... das negenteg eurosint per stuk. In guldens zol dat sikkom twij gulden wezen ... das n haalve gulden per hap.....

Ik versloek mie in mien kovvie.... "Wat wilt wel gekke", zee vraauw. "Wees toch nait zo gulzeg". "Lekker hè, dij ringen! Buurvraauw haar geliek". Ik knikte, nog noahoustend... twij kwartjes per hap...!!

Tjongejonge...wat hebben wie t toch goud...! Woarom proaten wie den nog aaltied over de "gooie olle tied" ?

Optaikens van n grootmoe



Strubbels tussen ouders en kinder waren der vrouger en binnen der nou.

Mor t soort is veraanderd en zai kommen veul vrouger. t Zal wel mit de tied te moaken hebben, dink ik.

Mien schoonzeun en zien oldste wichtje haren kortsleden strubbelderij mit n baaident. t Wichtje wol nait luustern en kreeg dat te heuren. Ze wer der grammiedeg van en ruip heur voder tou:

” Geef mie joen sleudels van auto mor, din rie k noar grootvoa en grootmoe. k Goa doar wel hin !!”

Giny Vonk

VEKAANZIETIED

Veur veul minsen n plezaaier, op pad, vot, zo wied as t kin. Nait veul mit en zo makkelk leven as t meugelk is.

Mor der binnen ook lu, dai de griezels over de grauwels der van lopen.

Allain aal de doagliekse karrierefarrie: Sloopen op n berre, woar zoveul aandere lu in lagen..... Onder n does of in n loezebad, woar veurhen meer minsen west binnen.....

En t slimste van aal noar n plee, woar zoveul aandern gebruik van moakt hebben. Aal dij aksies bedaarven t plezaaier, aleer vekaanzie begonnen is.

Zuks soort minsen kinnen beter in aigen hoes blieden, mor ja, mins wil wel ais wat anders.

Joe vroagen joe gewis oaf, hou k op dizze gekwedel kommen bin.

Dat zel k joe votdoadelk oetstukken.

In t blad van de olde ANWB ston n inzonden braif, woarin dizze leste minsen aandud werden.

Net n babbelguuchie, moar dìn veur mie en k hoop ook dat joe der de poelegrap van inzain.

Twij hemmelge zusters gingen aal op vekaanzie noar n boetenhoes in n nijmoods paark.

Noadat ze in t aanweezen hoes kwamen, wer der eerst tamtaaierd.

Zomoar wonen in n hoes van n aander.....

Gain sproake van !!!!

t Haile hoes wer hemmeld van beune tot vlouer. Om vijf uur waren ze tou aan n kopke kovvie in n schapschoon hemmeld hoes. Ze haren t eerste kopke nog nait op, of de veurdeurbèl roasde deur t hoes.

Nou aal verziende ?

Dekselse koaters !!!


t Was de boas van t spul, dij har baaide domes wat oettestokken.

Der was n vergizzen holden.

Ze werden vrundelk verzöcht noar n hoes eefkes wiederop in t paark te verhoezen.

Dit hoes was mit ingaang van mörgen aan aander lu touzegd.

Giny Vonk



Limerick.

Een Grunneger en twij Drinten
luipen bie de hoezen laangs te venten
mit appels en peren
ze wollen hail geern
verkopen veur n hailebult sinten

Jan van Dord

ain (s)limmerik

n olde vraauw oet Zuudloaren,
wol ains heur bainen onthoaren.

mor wos nait wat zie dee,
kreeg n saaize van stee.

t bluiden kreeg t volk sikkom nait tot bedoaren!

Roel Sanders van 't Knoal



Pabbe (8 juli 2007)

Maank waarme eerde
en zuide eerappelgeur
roek ik joen zwait
zwingend zeggen ve moi
en aanveren t verdrait

Ie hebben ze poot
bluien en wazen zain
mor nich meer rudt
Veur tied oet tied
hef klokke ludt

Op knijen trek ik t loof
kraab mit blode handen
groaf in mien gedachten
schudt aal t gold in kōrf
Wat vot is blief k verwachten

Kieken (25 feberwoarie 2007)

Vanmōrgen keek ik nog as n kind
open en goudeg

mor in nommerdag zag ik hou
bie n demestroatsie van nije fascisten
lu dij tegen wadden, oppakt wuiden

en in oavond heurde ik t verhaal
van n moeke en n lutje kind dij
oet n kander hoalt binnen
op Schiphol
umreden dat ze nich de juuste papieren
hadden

t moekt mie gramnieterg
bienioa was k in sloap vallen
mor k zai de kromme kaande
van wat mie aal wol liek tou leek

mōrgen kiek ik weer as n kind
open mor scharp



Maart (17 juni 2007)

Maart vol madden en bainen
keboal van lagen en belken
Flaauw vis in neuze
kikt mie mit schelvisogen aan
Roeken van braande neuten
en wierook bie kirrel tulbaand
Van vèrren n gezichten
mor stoef bie koppen
Nikken en 'moi' as t mout
Kooplu kieken ofwezig
mor loeren scharp
Woarend stevelen laans kroamen
zuik ve wavve nich vinnen
Verlöst aan t inne
dink k: wat douk hier?
En ankom weke weer vannais
Mor daip sistert kebid

Hanne Wilzing

Voele stevels.



“Remko, Remko, eten!”
Moeke ston in achterdeur te roupen. Zai keek om t hoes tou, moar gain Remko. Al-tied was jong in de buurt en net tegen etenstied ging hai weer aan swin. Zai ruip nog n poar keer. Gain Remko. Nee, ook gain wonder, want Remko zat in t gruinaand net achter n haile dikke gruine kikker aan. Hai kon hom nait kriegen, want dij kikker wupte mit grode sprongen deur t gras en dook op t leste mit n plomp in n braide sloot. Verdikkemie, mis! En hai haar om ja sikkom te groazen. Hai keek om zok tou of der nog meer kikkers wazzen, moar hai zag gainent meer.

Misnoug't dee hai baide handen in buuts, draaide zok om en luip op hoes aan. Torenklok sluig zes uur. Zes uur? Verdorie din was hai al weer veuls te loat, want om haalf zes mozzzen ze waarm eten. Hai zette sokken der in en zwoar achter de poest smee't hai achterdeur open, vloog schuur in en dat noar keuken.

Pa, moeke en zien lutje bruiertje zaten nog bie toavel, t eten was al op. Allennig bruiertje haar nog n flotje zoepenbrij veur zok stoan. “Bist weer mooi op tied,” zee pa. ”t Eten is al op.”

“Joa moar ik heb ja zo'n honger,” zee Remko. ”Din most moar kommen as moeke die ropt,” zee pa.

“Moar ja, as je dat din nait heuren.”

“As t wat eten wilt, most die moar n poar hompstokken brood smeren,” zee moeke en begon toavel of te roemen. Remko luip noar keukenkaast en dee deur open.

“En nou lopst mie alweer mit dien voele stevels over mien schone vlouer hin. Oet, dij stevels!” zee moeke.

Remko luip weer noar schuur en begon zien stevels oet te trekken. Linker wol wel, moar rechter zat oareg vast. t Was of dij stevel zok vastzoog om zien vout.

Hai dee schuurdeur open en zette zien hak tegen druppel aan en dou moar sjourren. Joa, der kwam al wat bewegen in. Nou n moal of wat goud schoppen en doar vloog stevel hom van vout of. Liek omhoog! Rinkel de kinkel klets bats boem! Remko zien stevel vloog dwars deur t dakroam van schuur hin en bleef op dak liggen. Glas kwam omdeel en lag deur haile schuur hin. Remko ston stief van schrik in deur. Hoerekerel, nou was de gört goar. Pa kwam der al aan broezen, greep hom bie kladden en zee:
”En nou veur straf zunder eten en mit blode vouten op bère!”

F.H.Zandinga.



Zomor n overdenken.

Zol t ?

Zolt geeft t leven kleur en fleur,
nait allent vandoage, mor t hail joar deur.
d'r zunder krie'j wsse verdrait.
Opzoltjen mouten joe zörgen nait.

ain snufken zolt heurt in zoepenbrij,
vrouger was zolt sikkom nait te betoalen,
mor t muik mensken vrij.
Man mos t wel van slim wied hoalen.

t Leven gait nait aatied over rozen,
der zitten ook wel ains stiekels aan.
Kiek mor oet ai'j ze mout lozen,
aans kost 't joe n fikse kras op haand.

Noa slegte -, komen weer goje tieden,
zo zit 't leven maisttieds in mekoar.
Mie dunk't 't kin altmangs n stötje lieden
as joe traauw blieven joar noa joar.

Geef zoltpot n ereploats op toafel,
dai mukt ja t eten en t leven minder flaauw.
Joe kinnen der vervast over mitproaten:
Zolt is trots van elke vraauw.

Roel Sanders van 't Knoal

LOOP MOR DEUR



Loop moar deur, met kop ien e wiend, loop moar deur.
 Loop moar deur, dizze wereld is dienend, loop moar deur
 Loop deur, loop deur, kiek niet achterom,
 want ver veur dij uut ligt e horizon.

Dien nije schoenen en dien kôrte broek
 En n flesje wotter veur e dorst
 De weg ligt kloar, hufst niet op zoek
 Kom goa moar met astoe duurfst

Soamen onnerwegens, de zonne schient
 Soamen onnerwegens, goa met de wiede wereld ien

Loop moar deur, met kop ien e wiend, loop moar deur.
 Loop moar deur, dizze wereld is dienend, loop moar deur
 Loop deur, loop deur, kiek niet achterom,
 want ver veur dij uut ligt e horizon.

Al wiest nog niet woar dast henne gijst
 Al doen dien benen zeer
 Kom op, we goan der uut vannijs
 Zo gijst t elke keer

Loop moar deur, met kop ien e wiend, loop moar deur.
 Loop moar deur, dizze wereld is dienend, loop moar deur
 Loop deur, loop deur, kiek niet achterom,
 want ver veur dij uut ligt e horizon.

De kop weer leeg, dien hoaren lös
 Dien wangen gloeiend glen
 Kom pak dien jas, de hond ken met
 Moar we wieten nog niet woar henne.


Soamen onnerwegens, de zonne schient
 Soamen onnerwegens, goa met de wiede wereld ien

Loop moar deur, met kop ien e wiend, loop moar deur.
 Loop moar deur, dizze wereld is dienend, loop moar deur
 Loop deur, loop deur, kiek niet achterom,
 want ver veur dij uut ligt e horizon.


Geert Zijlstra

Cyclus

Laange zummer kropt onwilleg noar september.
Haarst komt. Hou aans vaalt nou dat licht
De kleur van raait ien t midden van november.
Woorden vienden vanzulf heur vörm ien n gedicht.
En straks wordt t koller, t is ja hoast december.
Midwinterfeest mit waarmte komt ien zicht.




t Daip bevroren, dat kin best ien januoari.
Dij gruun en grieze tint van winterlucht.
Zol der nog n snijstörm komen ien februoari?
Aal t leven van minsk en plant en daaier vlucht.
Nog even scheuveln, din ienaains – verdorie –
is t deu. Snijproeksel hemmeln mit n zucht.



Snijklokjes dij as eerste boven komen.
n Geel tapijt van winteraconiet. n Woas
van wit en lila krookjes, poaskeblommen,
din tulpen ien violet, oranje, rood en rose.
En wat staait doar? Wat vrouge anemonen
Zo veul te zaain, te mooi hoast veur ien voas.



Dat is woar ik mie zo over verwonder:
dij joargetieden ien heur aigen klaid.
t Leven is n rad, draait aal ien t ronde,
wizzelt ien tied, plezaaier en verdrait,
geft hier geluk, slaggt verderop n wond.
Hou t öflopt, nee, dat wait ik nait.



Siet Bootsman

| | | | | | | | | | | | | | | | |
|----|----|----|----|----|----|----|----|----|----|----|----|----|----|----|----|
| 1 | 1 | 2 | 3 | 5 | 7 | 6 | 10 | 13 | 12 | 5 | 8 | 10 | 3 | 6 | 4 |
| 2 | 13 | 14 | 12 | 1 | 19 | 6 | 5 | 10 | 8 | 15 | 6 | 14 | 16 | 18 | 9 |
| 3 | 20 | 5 | 21 | 21 | 6 | 10 | 3 | 4 | 15 | 21 | 18 | 3 | 22 | 5 | 11 |
| 4 | 20 | 6 | 12 | 5 | 20 | 7 | 18 | 3 | 23 | 16 | 11 | 3 | 6 | 22 | 6 |
| 5 | 19 | 19 | 20 | 7 | 24 | 18 | 25 | 1 | 17 | 12 | 20 | 5 | 22 | 5 | 10 |
| 6 | 25 | 11 | 24 | 16 | 16 | 6 | 2 | 18 | 4 | 20 | 3 | 21 | 21 | 6 | 2 |
| 7 | 24 | 5 | 8 | 10 | 3 | 6 | 9 | 5 | 2 | 19 | 22 | 24 | 14 | 6 | 11 |
| 8 | 4 | 26 | 27 | 5 | 10 | 6 | 2 | 20 | 25 | 6 | 11 | 7 | 3 | 5 | 2 |
| 9 | 27 | 3 | 2 | 21 | 23 | 20 | 6 | 7 | 7 | 5 | 10 | 16 | 24 | 6 | 1 |
| 10 | 3 | 5 | 12 | 6 | 2 | 21 | 11 | 3 | 5 | 9 | 22 | 16 | 3 | 6 | 4 |
| 11 | 16 | 3 | 6 | 25 | 27 | 24 | 17 | 17 | 5 | 20 | 23 | 8 | 18 | 21 | 1 |
| 12 | 4 | 12 | 3 | 2 | 27 | 19 | 21 | 21 | 6 | 2 | 24 | 12 | 14 | 14 | 9 |

Vul de woorden in volgens d'omschrievens.

Vervang de nummers hieronder deur letters en joe kriegen een Grunnegse oetdrukken.

27 18 3 3 1 7 6 7 14 22 5 20

22 18 2 7 6 21 24 18 10 24 23 25 20 5 7 6 2

1 Moakt mien pak mit zien mes op moat 2 n Soort baauwmantje ? Nee, mor t wiefke is wel net zo beweeglek 3 Drop, doe waist ook wel wat.....4 Bloumke wil nait mit mes en vörk eten, dij loat hai dus liggen. 5 Elke dag gewoon. 6 Wat heur ik nou, binnen dat kinder of beren ? 7 Oet de grond trekken en der mit van deur goan 8 De kapper gebruikt ze, dut het asmis nog en vraagt der te veul geld veur. 9 Ain van de hounder is op weg 10 Om op dat lutje boomke te schrieven ? 11 Kereltje, dat insekt mout voak pizzen. 12 Mit de biel in t raag rond spaddeln 13 Nassi oet de klödde veur dij vogel 14 Pak dij tas, den bist rusteg. 15 Stemt in Grunnen, d'eerste derbie en hai is meer as keuneg. 16 Kinst der keze mit haarken of heu mit fien moaken ? 17 W.C. wied vot?, neem dij kouke den mor. 18 Lekkers mit de tong noar binnen waarken 19 woagen vol vreterij. 20 t Wichtje hangt veur t roam. 21 k Zai hom voak vlaigen, mor nait in dij boom hangen. 22 Dat wicht is nait bliede mit heur noam. 23 Dieet veur kromme bainen 24 Goidag zak.

Puzzel van Kreuze 7 :

1 schienvat 2 twijduustern 3 aingoal 4 maaltvreten 5 kleumkadde(katte) 6 pakjedroager
7 grienderd 8 meneuvels 9 gebelskop 10 neefje(ke) 11 schildersmeskes(jes) 12 schoulapper
13 sodom 14 oas 15 oordail 16 goar 17 jank 18 ka 19 veers 20 aigen 21 haail
22 oetloper 23 til

Henk de Weerd

Poaskevliender

“Most hier es kieken, gaauw, aans is e weg !”

k Stoa net boven op de ledder om de lösztende vaarve van de windveren te schuren.

“Wat is der nou weer, kinst nait zo vertellen?” “Nee, kom nou gaauw, n hail mooie vlinder, zo aine heb k ja nog nooit zain.”

Ik zucht es daip, mor besloet toch mor om even noar beneden te goan. t Zel wel weer niks biezunders wezen.

“Hier tussen de bloodern, kiek mor es”.

Mien ogen volgen Coba's wiezende vinger.

En den, ik kin t hoast nait geleuven, doar zai ik n vlinder van zeker tien centimeter in deursnee mit n deurzichtige gruinachtige kleur. Stomverboasd stoa ik te kieken. Dit kin ja nait. Zo' n vlinder heb ik ook ja nog nooit zain, zulf s nait in mien vlinderboukje.

“Mien fototoestel !” Ik run noar de kaaste en griep mien fototaze van de bovenste plaanke. Mit toestel in aanslag weer noar boeten. De lens komt der nait oet. “Ook dat nog, batterijen leeg en dat op zo' n moment...!”

Ik grobbel in de taze om mien reservebatterijen te zuiken. Gelukkeg zitten ze derin. Even loater komt de lens wel noar boeten. “Hoal doe dat takje even opzied, den komt der wat meer licht bie. Verzichtig nou, straks vlogt e weg”. Ik moak n stuk of wat foto's van verschillende kaanten.

“Ik mout Henk even bellen”, bedenk ik den.

Henk Dikkemoo, mien old-collega en vlinderexpert. Dij raaist ja hail Europa òf om foto's te moaken van de maist zeldzoame vlinders. Ik run weer noar de koamer veur de telefoon. “Henk zien nummer, waar is dij nou weer? Doar is de klapper.” Mit trillende vingers druk ik de toetsen in. Telefoon wordt nait opnomen. Dat is ook zo, Henk zit in Frankrijk. Was ik ja glad vergeten.

Ik run weer noar boeten. Vlinder zit der nog.

“Jan Blaauw”, heur ik Coba zeggen, “dij moakt ook groag foto's en hai het ook n goud toestel. Zai bèlt Jan votdoadelk.

Nait laank doarnoa heur ik Jan en Gé mit heur baaident over t grind lopen.

“Hai blift wel mooi stil zitten”, zegt Jan as e even loater ook wat foto's moakt.

Dat verboast mie aiglieks ook wat.

Gé bekikt de vlinder ook nog es goud.

“Doaronder zit nog aine !”, zegt ze den.

Ik kiek ook nog es en zai inderdoad tussen

de bloodern nog net zo'n vlinder zitten.

Nou begun ik toch wat achterdochteg te worden.

Verzichtigteg roak ik mit mien vinger de vleugel aan. Vuilt wel wat haard aan en hai beweegt mor nait.

Den inains zai ik op de ploatse woar de potten heuren te zitten n soort klain wasknierpette. Nee toch, dat kin nait woar wezen.

“Verd... Hest mie belazerd !”, kin ik nog uutbringen”.

Mor aan de verboasde ogen van mien vraauw zai ik dat ik t bie t verkeerde inde heb.

“Nee, eerlieks woar nait, ik docht ook dat e echt was, mor nou ik der over noadenk. Ik haar dit joar n poasketakke mit van dij mooie nepvlinders derop, net echt. Kin wezen dat ik dij hier opzet heb. Mor dat was ik den glad vergeten”.

Bie n kop kovvie konden we der gelukkeg zulf nog om lagen.

k Was wel hail bliede dat Henk in Frankrijk zat en de telefoon nait opnam.

k Haar t nog laank mouten heuren.

Dou mie dus n plezaaier en vertel dit verhoal nait wieder.

En as je nait willen dat joe zowat ook overkomt, kiek den mor es op Henk Dikkemoo zien webstee. Kin je vast nog hail wat van leren.

www.vlinderskieken.nl

Henk de Weerd

